

आकाशवाणी

1. प्रधानमंत्री नरेन्द्र मोदी होरें आक्खेया जे पाकिस्तान कन्नै आतंकवाद ते पीओके दे इलावा कुसै होर मुद्दे पर गल्लबात नेई होई सकदी
2. भारत ते पाकिस्तान बश्कार कल संजा डीजीएमओ सतह् दी गल्लबात च दौनें मुख्य इक्क दुए खिलाफ इक्क बी गोली च चलाने ते इक दुए खलाफ कोई उकसावे जां हमले आली कारवाई नेई करने लेई सहमत होई गए न ।
3. सरकार ने जम्मू कश्मीर च बन्नै कन्नै लगदे ईलाकें गी छोड़ियै होरने थाहरें स्कूलें गी वापस खोलने दा फैसला कीता ऐ ।
4. भारतीय जनता पार्टी आपरेशन सिंदूर दी कामयाबी मगरा अज्जै थमा 11 दिनें तोड़ी मुख्य भरै च तिरंगा रैली दा आयोजन करोग ।
5. बीसीसीआई ने भारत ते पाकिस्तान बश्कार तनाजै कारण इक्क हफते लेई रोके गेदे आईपीएल 2025 गी इस म्हीनें दी 17 तरीक थमां परतियै शुरू करने दी घोषणा कीती ऐ ।

<><><><><><>

**PM-Address**

प्रधानमंत्री नरेन्द्र मोदी होरें आपरेशन सिंदूर दी कामयाबी दे बाद आतंकवाद कन्नै मकाबले लेई भारत दी अनट्रुट वचनबद्धता दा जिक्र करदे होई आखेआ ऐ जे आपरेशन सिंदूर अजे खत्म नेई होआ ऐ, इसी छड़ा आरजी तौरा पर अगड़े पाया गोआ ऐ। उनें अगगे आखेआ जे औने आले दिनें च भारत पाकिस्तान दी हर इक हरकत पर नेड़मी तक्क रखग, इस पैमाने पर जे ओ आतंकवाद गी लेइयै रौह् अख्तेयार करदा ऐ। कल संजा राष्ट्र गी संबांधत करदे होई प्रधानमंत्री होरें आखेआ जे दुनिया भारत दिएं छमताएं गी दिक्खी चुकी ऐ जे हुन एह सारें गी साफ होई गोआ ऐ जे आतंकवादिएं गी कुसै बी सूरतै च बख्शोआ नेई जाग। उनें गलाया जे आतंकी गुटें ते उंदे समर्थकें गी इक साफ संदेश देई दित्ता गोआ ऐ जे भारत अपने नागरिकें पर होने आले कुसै बी हमले दा पूरी तगड़याई कन्ने परता देग। मोदी होरें साफ कीता जे आतंकवाद ते गल्लबात कन्नो कन्नी नेई चली सकदे, आतंकवाद ते कारोबार कन्नो कन्नी नेई होई सकदा ते पानी ते खून बी कन्नो कन्नी नेई बगी सकदा ते पाकिस्तान कन्नै ओहदे कब्जे आले जम्मू कश्मीर दे ओहदे कब्जे आले हिस्से पीओजेके दे इलावा कुसै होर मुद्दे पर गल्लबात नेई होई सकदी। प्रधानमंत्री होरें आतंकवाद गी समर्थन देने लेई पाकिस्तान सरकार ते उंदी फौज दी नुख्ताचीनी करदे होई उनेंगी सौहगा कीता जे उंदियां इस चाल्ली दियां हरकतां उंदे समूलचे नाश दा कारण बनी सकदियां न।

<><><><><><>

**DGMO Talks**

भारत ते पाकिस्तान बश्कार कल संजा फौज दी कारवाइएं सरबंधी महानिदेशकें डीजीएमओ सतह् दी गल्लबात होई। इस बारे जारी इक ब्यानै च भारतीय सेना नै आखेआ जे गल्लबात दरान इस गल्लै पर बी सैहमति बनी जे दौनें धड़ें दा कोई बी ना ते गोली चलोग ते ना गै इक दुए खलाफ कोई दुश्मनी जां हमले आली कारवाई करोग। एहदे इलावा दौनें धड़ें बन्ने पर ते अगेत्रिएं चौकिएं पर तैनात अपने सैनिकें दी गिनतरी गी घट्ट करने बारे बी योजनाबद्ध तरीके नै बचार करने पर सैहमति जताई। भारतीय फौज नै आखेआ ऐ जे बन्ने पर हालात कुललाई पाइयै सामान्य बने दे नं।

<><><><><><>

## DGMO Breifing

ब्लाई कारवाइएँ सरबन्धी महानिदेशक एयर मार्शल एत्रके.भारती होरें जोर देइयै आखेआ ऐ जे भारत दी लड़ाई पाकिस्तानी फौज कन्नेनेई, उत्थें मजदूद आतंकवादिएं ते आतंकवादिएं गी समर्थन ते आसरया देने आले ढांचे कन्ने ऐ। उनें आखेआ जे एह बड़ी माड़ी ते मंदे भागें आली गल्ल ऐ जे पाकिस्तान नै आतंकवाद खलाफ भारत दी लड़ाई च दखल देने ते आतंकवादिएं दा पक्ख लैने गी चुनेया जेहदे पर भारतीय थेआरबंद बलें गी फही अपने स्हाबै कन्ने परता देने लेई मजबूर होना पेआ। कल नमीं दिल्ली च आपरेशन सिंदूर बारे मीडिया गी जानकारी दिंदे होई एयर मार्शल भारती होरें दस्सेआ जे किश चाल्ली भारतीय बलें पाकिस्तान दे आम लोकें ते मिल्द्री ढांचे गी घट्ट कोला घट्ट नुक्सान पजाए दे आतंकवादिएं ते उंदे ठकाने गी नशाना बनाया।

<><><><><><>

## International Support

आतंकवाद खलाफ भारत दी मजबूत प्रतिक्रिया गी अंतर्राष्ट्रीय समुदाय समर्थन लब्धा ऐ। बरतानियां, अमरीका, रूस, ईरान, इजराइल, संयुक्त अरब अमिरात, फ्रांस, मिस्र, कतर, ते यूरोपी संघ नै आतंकवादी हमले मगरा भारत कन्ने एक्का जाहर कीता ऐ।

<><><><><><>

## J&K Schools

जम्मू कश्मीर सरकारै जम्मू ते कश्मीर खित्ते दे उनें जिलें दे स्कूलेंगी परतियै खोलने दा फ़ैसला कीता ऐ जेहदे बन्ने कन्ने लगदे इलाकें थमां दूर न। शिक्षा मंत्री सकीना इत्तू होरें सोशल मीडिया पोस्ट एक्स पर एहदी घोषणा कीती। उनें आखेआ ओ जिले जेहदे बन्ने कन्ने नेई लगदे, उत्थें सारे स्कूल ते कालेज अज्जै थमां खुल्ली जांगन। एह फ़ैसला हाल च गै बन्ने पारा थमां गोलीबारी दी घटनाएं दे मगरा जमीनी हालात दा व्यापक जायजा लैने मगरा लैता गेआ। एहतियात दे तौर पर बन्ने आले इलाकें कन्ने लगदे शिक्षा इदारे अजें बंद रौहगन।

<><><><><><>

## Tiranga Rally

आपरेशन सिंदूर दी कामयाबी दे बाद बीजेपी अज्ज मुख् भरै च 11एं दिनें दी तिरंगा रैली कड्डने जा'रदी ऐ। इस दरान प्रधानमन्त्री नरेन्द्र मोदी सरकार दे मजबूत नतृत्व ते थेआरबंद बलें दी दलेरी बारे लोकें गी दस्सेआ जाग। 23 मई तोड़ी चलने आली इस यात्रा च समाज दे प्रमुख शहरी, साबका फौजी ते समाजी कार्जकर्ता बी शामिल होंगन। पार्टी दे सूत्रें जानकारी दित्ती ऐ जे एह अभियान दा सरूप कुसै बी चाल्ली सियासी नेइं होग ते एहदा मकसद पूरे देश गी ऐसे मुद्दे पर इकमिक्क करना ऐ जेहदे नै समाज दे सब्बने वग्रें दा समर्थन इस इकजुटता रैली गी हासल होए।

<><><><><><>

## HM-FM

गृहमंत्री अमित शाह होरें आखेआ ऐ जे समूलचा राष्ट्र अपने थेआरबंद बलें दी बेमसाल दलेरी गी सलाम करदा ऐ जेहदे साढे दुश्मनें दा समूलचा नास करने आले ते भारत दे सुरक्षा कवच न। इक सोशल मीडिया पोस्ट च गृहमंत्री होरें आखेआ जे आपरेशन सिंदूर राएं भारत नै एह साबत करी दित्ता ऐ जे भारत दे कुसै बी बैरी गी बख्शेआ नेईं जाग। विदेश मंत्री डॉ. एस.जयशंकर होरें बी प्रधानमंत्री हुंदे राष्ट्र दे नां संदेश दी सिफ्त करदे होईआखेआ जे एह संदेश देशवासिएं गी प्रेरणा

देने आला ते आतंकवाद खलाफ भारत दे रौंह गी पूरी चाल्ली साफ करने आला हा। इक सोशल मीडिया पोस्ट पर विदेश मंत्री होरें आखेआ जे आपरेशन सिंदूर राएं सरकार नै अपना वायदा पूरा कीता ऐ। तोआई केन्द्री मंत्री ते बीजेपी दे राष्ट्रीय अध्यक्ष जे.पी.नड्डा होरें बी प्रधानमंत्री हुंदे संदेश दी सराहना करदे होई आखेआ जे भारत नै पाकिस्तान गी आतंकवादिएं दे समर्थन करने गी लेइयै खबरदार करी दित्ता ऐ।

<><><><><><><><>

## US-President

भारत नै अमरीका दे राष्ट्रपति डोनाल्ड ट्रंप दे उस दावे गी खारज करी दित्ता ऐ जे उनें दौनें मुख्ये कन्नै बड़ा मता कारोबार करने दी गल्ल आविख्यै भारत ते पाकिस्तान बश्कार मुख्ये दे तनाजे गी खत्म कीता ऐ। विदेश मंत्रालय दे सूत्रें आखेआ जे 9 मई गी भारत दे प्रधानमंत्री नरेन्द्र मोदी ते अमरीका दे उपराष्ट्रपति जे.डी. वैंस हुंदे बश्कारहोई गल्लबात च कारोबार बारे कोई चर्चा नेई होई। सूत्रें दस्सेआ जे आपरेशन सिंदूर शय होने मगरा अमरीका दे विदेश मंत्री मार्को रोबियो होरें 8 ते 10 मई गी विदेश मंत्री डॉ.एस.जयशंकर ते 10 मई गी गै राष्ट्री सुरक्षा सलाहकार अजीत डोभाल हुंदे कन्नै गल्लबात कीती ही ते इस गल्लबात च बी कारोबार दा कोई जिक्र नेई कीता हा।

<><><><><><><><>

## IPL

बीसीसीआई ने भारत ते पाकिस्तान बश्कार तनाजै कारण इक्क हफते लेई रोके गेदे आईपीएल 2025 गी इस म्हीनें दी 17 तरीक थमां परतियै शरू करने दी घोषणा कीती ऐ। आईपीएल गी 9 मई गी आपरेशन सिंदूर शरू हाने मगरा मुअत्तल करी दित्ता गेआ हा। 17 मई पैहला मैच बैंगलुरु दे एम. चिन्नास्वामी स्टेडियम च रॉयल चैलेंजर्स बैंगलुरु ते कोलकाता नाईट राईडर्स बश्कार खेड्डेआ जाग, हालांके मोहाली ते धर्मशाला च कोई मैच बी नेइं खेड्डेआ जाग। आईपीएल फाईनल दा मैच 3 जून गी खेड्डेआ जाग।

<><><><><><><><>